

Bunas novas per ils acziunaris

Concern d'energia Repower SA: Onn da gestiun 2018

DA GION NUTEGN STGIER / ANR

■ **Bun onn da gestiun 2018 per il concern d'energia grischun Repower SA. La societad ha fatg in gudogn operativ da 35 milliuns francs. La svieuta, quella è puspè creschida sin duas milliardas francs. Buns affars ha il concern cunzunt fatg en l'Italia.** Ier ha la direcziun dal concern d'energia grischun Repower SA preschentà a las medias las cifras da l'onn da gestiun 2018. *Kurt Bobst*, il CEO dal concern, ha ditg ch'il davos onn saja stà per la societad in fitg bun onn. La raschun sajan cunzunt er ils megliers pretschs d'energia ed il martgà en general. Cunzunt en l'Italia haja il concert savì augmentar la svieuta grazia a la buna fiera d'energia. Vitiers vegnia er anc il gudogn supplementar cun diversas energias regenerablas sco l'energia solara, l'electromobilitad ed er l'energia da vent. Profità haja la Repower er che la Germa-

nia haja decidì da dismetter l'energia atomara ed ella pondereschia da sortir da l'energia da charvun.

Bun martgà tar noss vischins talians

L'onn 2018 ha il concern d'energia grischun Repower SA fatg ina svieuta da 2,1 milliardas francs (in augment da 13,2%). Cun quella summa ha la societad fatg dapì il 2014 puspè in stgomi sur duas milliardas francs. La raschun principala è che la Repower ha profità dal bun martgà d'energia en l'Italia e lura er ch'ìls pretschs d'energia èn stads in pau pli auts. Ultra da quai saja la valor da l'euro en cumparaziun cun il franc svizzer stada per in pau meglra, quai ch'haja immediat er ina ferma influenza sin il martgà da l'energia. Dasper la Svizra ed il Grischun è l'Italia in dals partenaris principals dal concern d'energia grischun cun la sedia principala a Poschiavo. Fatg ha la



Han preschentà las cifras plaschavlas dal concern d'energia grischun Repower: **Thomas Grond**, schef da medias, **Brigitte Krapf**, schef da finanzas e **Kurt Bobst**, directur (da san.).

FOTO G. N. STGIER



Bun onn da gestiun per il concern d'energia grischun Repower cun sedia principala a Poschiavo.

MAD

societad d'energia a la fin finala l'onn passà in gudogn operativ da 35 milliuns francs (augment da 4,7%) ed in gudogn net da 16 milliuns francs.

610 collavuratur

Il travagl d'energia ha en tut 610 empliads e da quels 168 che lavuran en l'Italia. Ultra da quai ha la Repower er 30 emprendists. En il Grischun è l'affar d'energia staziunà en sis lieus: a Bever, Glion, Cuvlignas, Landquart, Mustér e Poschiavo. La vendita d'energia, quella è stada l'onn passà tar 17 310 GWh ed è uschia stada per in pau pli auta ch'anc

l'onn precedent. Per il Grischun produgescha il concern d'energia Repower forza per 42 000 chasadas.

Il chantun Grischun il segund grond acziunari

Las total 7 390 968 aczias nominalas da la societad èn repartidas uschia: chantun Turgit 29,83%, chantun Grischun 21,96%, UBS-CEIS 18,88%, Axpo Holding 12,69% e persunas privatas 16,64%. Cun avair fatg la Repower buns affars il 2018 survegnan ils acziunaris suenter il 2013 puspè ina dividenda. Per aczia èn quai 50 raps, quai che vegn segir

er a far plaschair al cusseglier guvernativ e schef da las finanzas *Christian Rathgeb*.

Anc intginas cifras tar la producziun d'energia dal concern grischun. 54% derivan da la forza idraulica, 30% da la forza da gas, 4% da la forza da vent ed ils auters 12% da l'energia nucleara. Er en ils proxims onns vegn la Repower a far pulitas investiziuns, saja quai en il Partenz e lura a Poschiavo nua che l'implant da la forza idraulica duai vegnir sanà e fatg da nov per ina summa da 150 milliuns francs. L'onn passà ha il manaschi d'energia fatg investiziuns per ina summa da 35 milliuns francs.